



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Gabon tir inyaksü Brice Nguema shimogo

Bangladesh nunger asayar Litton asayatsü temsüa kümogo



VOL. XX NO. 324 (ADOK 324)

DIMAPUR SANGTENNÜ (TUESDAY)

RONGJUI (SEPTEMBER) 05, 2023

₹ 5.00

CM Sarma-i Amit Shah den AFSPA agientsü jembitep



Himanta Biswa Sarma & Amit Shah

Guwahati, September 4, 2023 (Agencies): Assam Chief Minister Himanta Biswa Sarma-i Union Home Minister Amit Shah den ajurutepe Assam nungi Armed Forces Special Powers Act (AFSPA) agientsü tebilemba lemsatepogo.

Hombarnü CM Sarma-i New Delhi nung Amit Shah den ajurutepe aser idangji Assam nung law & order tajungba akümba aser telungpur aika temai adokba indang osang lemsatep.

Telungpur teloktem peace accords aika sign sütepeba sülen telungpurtemi prangpong-injang aika bener temai adokogo. Maneni, sepaitem aser civilian asüba tatalokbatem mali anungji Assam nungi AFSPA agientsüla ta CM Sarma-i ashi.

Union Home Minister-i Sarma dang Assam ajungalen nungi AFSPA agientsü atema teinyaksü kar lemsatep.

Assam nung 1990 nungi 'Disturbed Area' notification mapa tenzuka liasü. April 1, 2022 nü district 9 aser district ka

kübok subdivision ka dak alaka tanungba tesem ajungalen nungi AFSPA agiena liasü.

Maneni, taküm April 1 nungi Assam nung district 8 nung dang AFSPA magien aser Cachar district kübok Lakhipur subdivision nungi agien.

Guwahati nung taküm Independence Day onük jembidang Chief Minister Sarma-i 2023 tatemlen tashi nung Assam ajungalen nungi AFSPA agientsü nükjiding ayuba metetdakja liasü.

"Ozü sorkari yimsü asütsü tenzükba sülen Assam district 8 nung AFSPA lir. Ozü sorkari taküm küm tatemlen tashi nung state ajungalen nungi AFSPA agienür. Ozü sorkar marudang tesüiba sorkartemi Centre dang 62 ben tashi AFSPA atsülangtsü mepishia liasü saka tangbo tensa melenshiogo" ta CM Sarma-i ashi.

CM Sarma-isa pai aniba sorkar mapang telungpur teloktem den peace accords pezü nung sign sütepe aser telungpur 8,000 jungnüa temai adokogo ta ashi.

Nagaland nung WCD Control Room lapokogo

Kohima, September 4, 2023 (DIPR): Linük den külemi Nagaland nunga Emergency response Support System-112 (ERSS) nung Child Helpline-1098 aser Women Helpline-181 bendenlokogo.

September 4, 2023 nü Secretary to Govt. Of Nagaland, Department of Social Welfare aser Mission Director Mission Vatsalya Martha R. Ritse, IAS-i WCD Control Room office lapoktsü.

"Iba centre lapokba ya benjung ka ama lir aser mapa inyaksü tayongzükba ka lir. Iba office lapokba ajanga tetsürtem aser tanurtem kümzükba ayutsüba tarutsü ka yangertsü atema mapa inyaksü ayongzük" ta Martha-i ashi.

"Tesüiba nung Childline ya Childline India ta ser NGO kati ketdangsüa liasü saka tangbo iba ya Mission Vatsalya kübok

denogo" ta Department of Social Welfare Director aser State Child Protection Society (SCPS) - Mission Vatsalya Member Secretary Tosheli Zhimomi-i ashi.

Ministry of Women and Child Development, Government of India-i tuyuba ama Social Welfare Department Nagaland ajanga Childline ketdangsüa repranger ta laisa ashi.

Linük den külemi WCD Control Room mapa tenzükba atema kanga pelar ta Tosheli-isa shisem.

Linük nung WCD Control Room amenoktsüba mapa ya Centre for Development of Advance Computing (C-DAC) nem nungloktsü aser iba ajanga Child Helpline-1098 aser Women Helpline-181 aser ERSS sendaktepe mapa inyaker.

"State shia nem WCD Control room balaka agütsür aser pei pei

state sasep nung 1098 aser 181 calls ya control room nung agizüktsü aser iba osangji pei pei district dangi yoktsü" ta Project Manager C-DAC (Thiruvananthapuram) Ajay V-ia ashi.

"WCD Control Room takok nua amenokba maparen nung shilem agir ajak dang pelar. Iba nung inyaker ajaki sensotem tajungtiba tenzüktsü ayongzük" ta Addl. Secretary to govt. of Nagaland, Department of Social Welfare Bodeno S Colo-ia metetdaksü.

Iba sentong nung mendenji Programme Manager State Adoption Resource Agency (SARA) RENCHUMI Imti liasü aser project Coordinator, Counsellor, Child Helpline Supervisors & Case Worker of DCPU Child Helpline nunger atema theory & practical training session agia tembang.

Manipur sorkari Editors Guild of India anema FIR benok

Imphal, September 4, 2023 (Agencies): Editors Guild of India (EGI) ajanga Manipur nung kin o kin raraba osang ka agütsüba anema state sorkari FIR ka benokogo.

"EGI president aser züngsem asem anema FIR benokogo. Manipur nung ita pezü tashi kin o kin tsüingda mangatetep adoka rarayonga aruba nung parnoki (EGI) meputep tali adokdaksütsü meranger" ta Chief Minister N Biren Singh-i ashi.

Imphal West district nung social worker Ngangom Sarat Singh-i FIR benok. EGI report

ya tejak repranga yangluba aser iba ajanga Manipur nung journalist tenüng menüktsüogogo ta Ngangom-i ashir.

September 2, 2023 nü sayaba EGI report nung Manipur journalist temi külen tsütsü dang shir osang zülü aser aiben parnoki Kuki-Zo nunger anema zülü ta shia lir.

Sorkari rara noktangtsü atema teinyaksü shitak meinyak aser journalists kümzükba mayu ta EGI report nungsa shia lir.

Ajisüaka EGI-i Manipur sorkari tai tongloktsüba magizük. "Onoki nisung aika

den sensaksemba sülen report yanglu, iba nung journalists, sorkar ketdangsürtem aser lokti lennirtem dena lir" ta EGI-i ashir.

Külen, Press Club of India (PCI)-ia Editors Guild of India fact-finding committee aser president anema FIR benokba khukhua aitsüogogo.

Manipur nung journalists tongti telok ana- All Manipur Working Journalists Union (AMWJU) aser Editors Guild Manipur (EGM) ajanga EGI report nung ashibaji tiyazü aser meshitak aika lir ta metetdaksüogogo.

Governor La. Ganesan-i TaFMA Excellence Awards agütsü



September 4, 2023 nü TaFMA Excellence Awards 2022-23 sentong nung Nagaland Governor La. Ganesan-i Andrea Kevichusa nem ultimate Achiever Award anguba atema sempet agütsüba angur.

Dimapur, September 4, 2023 (TYO): September 4, 2023 nü RCEMPA, Jotsoma nung Task Force for Music and Art (TaFMA) Excellence Awards 2022-23 agütsüogogo.

Iba sentong nung Nagaland Governor La. Ganesan-i alakteta jaoker ka ama shilem agia liasü ta PRO Raj Bhavan, Kohima sangdong ka nung metetdaksü. "Nagaland nung Task Force

for Music and Arts tentetba sülen nungi sobaliba maparen kanga junga inyaka arur. State sorkar mangdang kübok TaFMA-i mapa inyakba dang masü saka jenjang tajung tongogogo. TaFMA maparen ya Nagaland nung dang masü saka digital platforms nung kanga prokshir" Governor Ganesan-i ashi.

Sorkari Nagaland nung music and arts maparen kanga

junga anepalur aser nungiter. Sobaliba nung takar asüba aser sempet alir aika aliba ajiteta state sorkari senotsü agüja mapa balala inyaka arur aser iba ajanga sobaliba senmang ajungketba dang masü saka rongsenketzüng renloker ta pai ashi.

"TaFMA-i anir Nagaland nung music and arts fraternity yarirtem ajak dang pelar. Asenoki tarutsü putu ajungmesotsü

atema senmang tajung yutsütsü merangdi" ta Governor Ganesan-isa ayongzük. Paise TaFMA Excellence Award 2022-23 agütsü.

Sentong nung Task Force for Music and Arts (TaFMA) Nagaland Chairman Theja Meru-i Governor dang pelaba metetdaksü.

Theja Meru-isa Chief Minister Neiphui Rio dang pelaba ashidang "pa mangdang kübok TaFMA ya linük nung kanga tongtipang telok ka kümogo" ta ashi.

Iba sentong nung Nagaland Legislative Assembly Speaker Sharingain Longkumer, YR & S Advisor S. Keoshu Yimchunger, Advisor to CM Abu Metha, Commissioner & Secretary YRS Wezope Kenye, Director YRS Kethosituo Sekhose aser sorkar ketdangsür aika aden.

TaFMA Excellence Award 2022-23 angurtem:

1. Abel Assumi - Artist of the Year (International Brilliance Awardee)

2. Moa Subong (Padma Shri Awardee)
3. Sunep A Jamir (4 Superwinners of Nexa Music)
4. Guru Zachunu Keyho (Sangeet Natak Akademi Awardee)
5. Imnaainla Jamir (The H.E.R Awardee)
6. Moko Koza (Best Hip Hop Rap artist Awardee at Radio City Freedom Awards)
7. Kuvelu Tetseo - (Indian Icon Awardee)
8. Tetseo Sisters (National Excellence Awardee)
9. N.K Naga (Sangeet Natak Akademi Awardee)
10. Tonoto Zhimomi - (Mister Attitude World People's Choice Awardee)
11. Andrea Kevichusa - (Filmfare Awardee - Best Female Debut)

Iba sentong nung Andrea Kevichusa-i ultimate Achiever Award angu aser la nem Okusa Motors-i agütsüba Toyota Car ka agütsü.

Nagaland Rural Bank ajanga SHGs tem tushiba sentong agi



Nagaland Rural Bank ajanga SHGs tem tushiba sentong nung tangokba noksa angur.

Dimapur, Rongjui/Sept. 04 (TYO): India nung nuchiso ngur küm 77 ajungba nungtem nung NSRLM-i ajungketsüba SHGs nem tetushi agütsüba sentong ka September 4, 2023 nü Dr. Imkongliba Ao Hall, Raj Bhavan Kohima nung Nagaland Rural Bank ajanga ayongzüka liasü.

Iba sentong nung NSRLM aser Nagaland Rural Bank nungi ketdangsürtem, SHGs nungi teshimtet nüburtem aser Raj Bhavan ketdangsür aser staff tem dena liasü.

Iba sentong Nagaland Angh La Ganesan-i moatsü aser Nagaland Rural Bank ajanga iba ama sentong tajung ayongzüka asoshi pelaba lemsatep aser tarutsü anogotem nunga nübur tenzüka yimya tajung amshitsü ayongzüka liasü.

Nagaland nung aliba nüburtem pei sasa poksünga alitsü mechi Nagaland State Rural Livelihoods Mission ajanga SHG tem yariba ngua pai Nagaland Rural Bank dang

pelaba ashi.

Iba amala sentong yagi bank indang mangdang sayuba kisung masü saka linük terenlok aser yimchiyimjung den kanga peta inyaker, ta Angh-i ashi.

Iba ama lungjemer inyakba ajanga ka ama bilemer aser khuret külemi abener aser Central sorkar, Nagaland sorkar aser State Bank of India yara iba bank anitetba ya lungjemer inyakba nung tashi aliba sayur, ta ashi.

SHGs tem temolungtetba tulu nung inyakba ngua pai tenüngsang agütsü aser parnoki meranga inyakba nung süngjang tajung atangtsü imlar ta ashi.

Nagaland Rural Bank ajanga sen 2,567,4000 indang cheque ka agütsü, aser Angh-i iba sentong nung SHGs tem yaritsü asoshi NSRLM Mission Director nem amokja liasü. Paise SHGs nem sanction letters tem lema agüja liasü.

Joint secretary to

Government of Nagaland & Mission Director, NSRLM Smti Imtinenla, NCS ajanga sentong tenzüka jembidang 2013 küm yimdaklir tetsür ishikati SHG tentetba indang otsü ashi aser tanübo SHGs 15900 lir aser itemji yimdaklir tetsür lakh 1.30-i anepalur, ta ashi.

Parnok aika 'first generation rural entrepreneurs' kumogo aser lanur aika nem residential skill development agüja linük nung company balala nung mapa inyaker, ta lai ashi.

Chairman, NRB V.V Narayana-i pela agizükba o jembidang Nagaland Rural Bank ajanga SHG loan 120 agütsüogo aser parnok nem loan agütsüba ya sen lakh 223.70 alitsü, ta ashi.

Iba sentong nung Imsunsangla, President of Grace SHG Dimapur ajanga tajangshiba lemsatepa liasü, kong Chankimelna, NRB menden liasü aser GM, NRB Pemmichon Nakhedei-i melepzüng o jembia liasü.

Agniveer Recruitment Drive atema metetdaksür

Dimapur, Rongjui/Sept. 04 (TYO): Additional Deputy Commissioner, Kohima, Rhosietho Nguori-i Kohima District nung aliba nüburtem dang sangdong ka ajanga Agniveer Recruitment Drive indang metetdaksüogo.

Iba drive ya September

13-14, 2023 anogotem Rangapahar Military Station, Dimapur nung agitsü. Ibai Nagaland nungi shimteta aliba candidate tem atema dang lir, ta sangdong ajanga ashi.

Admit Cards mangu aliba candidate tem dang Army Recruiting Office

Rangapahar den Email swarkokila@nic.in mesüra Mobile Number 8974958673 ajanga tongteprateptsü metetdaksü.

Kasa sangdong ajanga nüburtem dang ashikülak mapa inyaker nungi jembua alitsü metetdaksü.

AKM-i amtsük yanglua ayokba tesemtem sema repringshima jaja



AKM aser Chief Medical Officer kübok Food Safety Officer -temi Mokokchung nung amtsük yanglua ayokba tesemtem sema repringshima jajaba mapang tangokba noksa.

Mokokchung, Rongjui/September 04 (TYO): September 4 nü Ao Kaketshir Mungdang(AKM), Chief Medical Officer kübok Food Safety Officer aser Food Safety tsütsülen tongtipur aika dena Mokokchung nung aliba amtsük aser ibala dak sentakba chiyungtsütem yanglua ayokba tesemtem sema repringshima jajaogo.

AKM aser department-purtemi tanu iba ama repringshima jajaba mapang nung amtsük ayoktak kar nung amtsük süir ayoktsü yua aliba nguteta itemji intokdaksüba den

ano amtsük tepong nung temetetsü aser nungtak tetuyuba zülubatem tim mesüi zülua alibattem melenshija tematongshitsü tim agutsüogo.

Ao Kaketshir Mungdang ajanga amtsük yanglur town nung ayokertem aser pei kidang yanglur jurila tongtepratep balala ajanga yokpiyokratem ajak dang amtsük ayokba nung kanga dang kumdanga shishilembatsü asoshi tekümdangtsü netetdaksüogo.

Taoba mapang AKM ajanga osang kaket balala nung amtsük yanglua shishilembar ajaki

nübur nem tajungtiba nung anepalua shishilembatsü metetdaksü.

Mokokchung nung yangluba amtsük ya Mokokchung nübur kisüngi sapua achiba dang masü, Nagaland district balala nung Mokokchung amtsük ya kanga sapua achir, tanga district-temi bener or kelen temelung masüba osang aika AKM mendendi tashi atongba lir, aji asünung tarutsü anogotem nung iba ama mataloktsü kanga dang kumdanga inyaktsü AKM ajanga shishir ajak dang akang akanga metetdaksüogo.

Mkg Treasury Officer ajanga pensioner-tem dang 'Life Certificate' agütsütsü sangdonger

Mokokchung, 04 Sep (TYO): Pensioner shirnoksa Sr. Treasury Office Mokokchung, nungi pension sen agizüker, parnok ajaki "life certificate" den repsema Pensioner Association Office Mokokchung nung yangluba Identity Card 'D' (renewed) aser pension payment order book (PPO) dena 11th September, 2023 tashi nung tongjang ta Treasury Officer (TO) Mokokchung ajanga metetdaksüogo.

Life Certificate ji office sodi masüba anogo nung office mapang Sr. Treasury office Mokokchung nungi agizükang. Item nungdakba kaketttem mapang shitak nung metongtsür nem pension sen magütsütsü. Iba maparen ya 'Vide Central Treasury Rule No - 367 & 360 (IV)' ozüng dak ajemdaker pensioner-tem shitak taküm ali mali, ibaji repringshitsü inyaker, ta kasa sangdong nungsa

metetdaksü.

TO Mokokchung-isa pensioner-tem shitak taküm ali mali repringshiba maparen ka inyaktsü aser iba atema anogo yamai lemsar; 9th October 2023 nü - Tsüsapang, Süngkumen Ward, Tongdentsuyong Ward, Alempang Ward, Alongmen ward, Dilong Ward, Yimyu Ward, Kapayong, Salangtem Ward aser Penli Ward ta alitsü.

10th October 2023 nü - Majakong ward, Artang ward, Marepkong ward, Lijaba Lijen ward, Mongsenbai ward, Kumlong ward, Kichutip ward, Sangtemla ward, Arkong ward aser Aongza ward agitsü. 11th October 2023 nü - Ongpangkong Tzükong, 12th October 2023 nü - Asetkong & Langpangkong tükong aser 13th October 2023 nü - Changkikong, Tsürangkong aser Japukong tükong ta tarensena agitsü

Osangbener dang Assembly Pass atema tenüng meshir

Kohima, Rongjui/Sept. 04 (TYO): 14 buba Nagaland Legislative Assembly indang Session tanabuba September 11-14, 2023 anogotem agitsü aliba osang abentsü asoshi local/regional/ national news dailies aser news agencies aser All India Radio (AIR) aser Doordarshan Kendra

(DDK) densema print aser electronic media nungi osangbener dang pei tenüng agütsütsü metetdaksüogo.

Tenüng/designations/ organisations aser contact t e j a n g j a iprnagaland@gmail.com dangi September 6, 2023 tashinung yoktsüla, ta sangdong ka ajanga ashi.

Post-Matric Scholarship aser Merit-Cum-Means Scholarship atema metetdaksür

Dimapur, Rongjui/Sept. 04 (TYO): Directorate of Technical Education ajanga taoba mapang metetdaksüba ama National Scholarship Portal ajanga Ministry of Minority Affairs, Government of India kübok session 2022-23 asoshi Post-Matric Scholarship aser Merit-cum-Means based scholarship scheme atema apply süa aliba kaketshirtem dang sangdong ka ajanga ashiba agi, Ministry ajanga pei Institute District/ States nung mesiaka kaketshir indang Bio-Metric agitsü melaogo.

Kaketshir shirnoki pei Institute District/ State nung mesür danga nung Bio-Metric aginer, parnok nem iba maangka khen agitsü asoshi September 4, 2023 nungi September 6, 2023 (anepdang 11:00 ako nungi nikongdang 7:00 ako) tsüngta pei indang NSP login nungi agitetsü.

Kaketshir temi State/ District

pei molungba nung shimtsüla aser NSP nung shia aliba ama documents tem upload asütsüla.

Kaketshirtem dang iba facility kanga kumdanga agitsü ajungshir, kechiaser outside Institute District/State nung authenticate asütsü khen shimba sülen institute nung authenticate mesütetsü, ta sangdong ajanga ashi.

Jangra aliba kaketshir dang Bio Authentication atema September 7 aser 8, 2023 anogotem Directorate of Technical Education, Kohima indang Conference Hall tonga arutsü metetdaksü.

Institutes indang HOI/INO dang kanga anepalua re-verification agitsü metetdaksü.

Iba dak sendakba nung helpline number +91-9233959973 mesüra dtenagaland@gmail.com ajanga tongteprateptsü akok.

DNSU ajanga Teacher's Day salem lemsatep

Dimapur, Rongjui/Sept. 04 (TYO): Bendanga agütsür shisalen sayur, shirnoki asen takum yangertsü, parnok nem akhuma tetushi agütsütsü aser tepela lemsateptsü Teacher's Day ya mapang tetemjen lir, kechiaser parnokji linük yangertem lir, ta Dumapur Naga Students' Union (DNSU) indang Secretary, Education & Statistics, Tesiding Newmai ajanga sangdong ka nung ashi.

Asen linük nung aliba state ajunga lungjeme iba tesayurtem anogo amunger.

Iba anogomung ajanga tesayur temi asen takum nung temelenshi bener arutsüba, tangatetba tajung aliba senso aser tarutsü lenir kumdaksüba indang asenok dang nenshia ashir.

Tesayur temi tekolok shisatsü ainba nung textbook dak alia jenjang tajung agütsür. Parnok ya asen len aniba tesangwa lir aser asen tekolok shisatsü sangwadaksür. Iba anogomung nung Dimapur Naga Students' Union ajanga tesayurtem dang tepela salem lemsateper, ta sangdong ajanga ashi.



September 04, 2023 nü New Delhi nung Rajghat anasa Mahatma Gandhi kürakyanglu sayaba sentong nung Tir Droupadi Murmu, Delhi Lt. Governor VK Saxena aser Darshan Samiti Vice Chairman, Vijay Goel nung tangokba noksa nung angur.

Odisha nung tsüngi lendong nung nisung 12 asü aser nisung 14 yiru

Bhubaneswar, September 04 (Agencies): Odisha nung tsüngi ajanga nisung 12 aiseta asü aser nisung 14 yiruogo; Hombarnü Odisha nung ghonda ana tsüngda tsüngi 61,000 ben dak tema yaa liasü, ta ketdangsertemi metetdaksü. India Meteorological Department (IMD)-i, September 7 tashi state nung tsüngsang-mopung kanga majungtsü, ta tekümdangtsü metetdaksüogo. IMD-isa, Bay of Bengal nung yipru tuluka tentetdar aser taruba ghonda 48 tsüngda iba yipruji ajanga Odisha tesem aika nung tsünglu sashia arutsü,

ta metetdaksü. Iba dak alia tan hopta tatembanglen tsünglu ano tesashiba arutsüa akok, ta IMD-i metetdaksü. "September 7 tashi district teimbaka nung tsünglu sashia arutsü tekümdangtsü metetdaksüogo," ta IMD-i metetdaksü. Tsüngi lendong nung asürtemji nisung pezü Khurda district nungi liasü, nisung ana Balangir nungi aser Angul, Boudh, Dhenkanal, Gajapati, Jagatsinghpur aser Puri district shia nung nisung kaka asü, ta SRC-i metetdaksü. Gajapati aser Kandhamal

district na nungbo tsüngi ajanga kiset shirurua 8 süogo. Mangyimer kibong shia nem state sorkari senotsü teyari sen lakh pezüzü (lakh 4) agütsütsü, ta ketdangsertemi sangdongogo. "Tzüngluruwa mongpu nung tsünglu mapang talangka maruba sülen asentenshir tsünglu aruba ajanga tsüngi lendong bulua ataloker," ta weather scientist temi metetdaksü. "Mopung temekong aser mopung talem na tsüktepbaba ajanga tsüngi aitsüsa tensa bener arutsür," ta kasa osang ajanga metetdaksü.

China Tir, Xi Jinping G20 senden nung madentsü

New Delhi, September 04 (Agencies): Hombarnü Chinese Foreign Ministry-i, tan hopta New Delhi nung ayongzükba G20 senden nung China Tir Xi Jinping madentsü, ajisüaka Ato kilonser Li Qiang leniba nung ketdangsertem arutsü, ta metetdaksü. Hombarnü Chinese Foreign Ministry otongdar, Mao Ning-i, September 9 aser 10 anogotem nung New Delhi nung ayongzükba 18buba G20 senden nung adentsü atema India-i Li Qiang jaokogo, ta metetdaksü. Mao Ning-i, State Council nungi Li Qiang-i G20 senden nung adentsü, ta metetdaksü. Ning-isa, "Iba senden nung ajaki melungtepa telemetba agitsü aser terenlok

ajungkettsütsü China-i imlar. Mapang ajak nung China-i iba senden ya tongtibang, ta züngshia shilem agir. Li Qiang-i G20 tsüngda amalitepbaba, G20 tashi itshitsü aser alima nung rongsenketzüng aser terenlok tsütsü tayongzükba balala koktettsü atema China tebilembatem lemsateptsü," ta metetdaksü. "G20 lenirtem senden takok angutsü atema onoki lenla ajak nungi inyaksü melunga lir," ta paisa metetdaksü. China Tir, Xi Jinping iba senden nung madentetba atema China-i kuli kecha memetetdaksü, ajisüaka Jakarta nung ayongzükba Association of Southeast Asian Nations aser East Asia senden nunga Li adentsü, ta

metetdaksü. New Delhi nung ayongzükba senden nung Russia Tir, Vladimir Putin-a madentsü. Phone ajanga jembidang Putin-i Ato kilonser Narendra Modi dang pa iba senden nungji medentettsü, ajisüaka pa melen Foreign Minister Sergey Lavrov yoktsü tebilemba lir, ta metetdakja liasü. New Delhi nung ayongzükba G20 senden nung US Tir Joe Biden, France Tir Emmanuel Macron, Australia Ato kilonser Anthony Albanese, Germany Chancellor Olaf Scholz, UK Ato kilonser Rishi Sunak, Japan Ato kilonser Fumio Kishida aser Brazil Tir Luiz Inacio Lula da Silva nung densema lenirtem aika adentsü.

Sept 16 nü Telangana nung CWC mezüngbuba senden amentsü

New Delhi, September 04 (Agencies): Taküm küm tatembanglen Telangana nung Assembly election agitsü lia Congress Tir, Mallikarjun Kharge-i tang tasen tentetba Congress Working Committee (CWC) mezüngbuba senden Telangana nung ayongzükogo. Congress-isa Telangana nung lokti senden ka ayongzükba state atema tenangzükba pongu sangdongtsü aser September 17 nü Bharath Rashtra Samithi (BRS) sorkar aitsüba kaket sayatsü.

ayongzüktsü aser iba senden nungji party-i taruba Telangana assembly elections atema tenangzükba pongu sangdongtsü. Iba lokti senden nungji Congress Tir Kharge, CPP Chairperson Sonia Gandhi, taoba mapang Congress Tir Rahul Gandhi aser party nung lenir tain aika adentsü," ta Venugopal-i metetdaksü.

New Delhi nung osangbenertem senden ka nung jembidang Congress General Secretary (Organisation), KC Venugopal-i, "Congress Tiri agizükba ama tang tasen tentetba CWC mezüngbuba senden September 16 nü Hyderabad nung amentsü," ta metetdaksü. Pasisa, September 17 nü senden ka ayongzüktsü aser iba senden nungji CWC züngsemtem, PCC Tirtem aser CLP lenirtem adentsü, ta metetdaksü. "Nikongdang Hyderabad anasa lokti senden tuluka

Lokti senden tembangba sülen Congress Tiri sentong ka tenzükja CWC züngsemtem, PCC Tirtem aser CLP lenirtemi Telangana nung assembly constituencies 119 semdangtsü. September 18 nü parnok nem lemezüktsüba assembly constituencies ajak semdangtsü. Venugopal-isa, CWC züngsemtem, PCC Tirtem aser CLP lenirtemi tesem balala nung party nung inyakertem aser lenirtem den shisa lemsateptsü, ta metetdaksü. Paisa, September 5 nü Congress Parliamentary Strategy Group senden ka amentsü aser iba senden nungji September 18 nungi 22 tashi Parliament temeja senden atema asalentong yanglutsü, ta metetdaksü.




September 04, 2023 nü Puthuppally Assembly constituency by-election agitsü atema Polling official tem polling booths-i aodang tangokba noksa nung angur.

Tanü Uttar Pradesh nung assembly by election agitsü

Lucknow, September 04 (Agencies): Mongolbarnü Uttar Pradesh nung Ghosi assembly menden atema by election agitsü aser iba ya tang mezüng opposition INDIA teloktep aser BJP-i aniba NDA teloktep na tsüngda tetendangba ka ama züngshitsü. Indian National Developmental Inclusive Alliance (INDIA) nungi Congress, CPI(M), CPI aser RLD ama party temi Samajwadi Party (SP) candidate, Sudhakar Singh yaritsü ta sangdongogo. Singh-i BJP candidate, Dara Singh Chauhan den tokteptsü. Chauhan-i SP toktsür BJP nung adenba sülen pai Ghosi menden nungi anena liasü. Iba by election nung maneni pai tokteptsü. National Democratic Alliance (NDA) teloktep nungi Apna Dal (Sonelal), NISHAD

Party aser Suheldev Bharatiya Samaj Party (SBSP)-i pa yaritsü. Chauhan-i iba menden nungi anenba ajanga by election agitsüsa aküm. Pai takok nguaka mesüra menguaka ibaji ajanga state nung BJP sorkar kecha balaka masütsü, kechiyong menden 403 aliba assembly nung BJP majority lir. Ajisüaka iba election ya sangküm Lok Sabha election atema temaitsü ka asütsü ta züngshir. Ghosi assembly nung voters lakh 4.38 shi lir aser iba nungjagi Muslim nung nung 90,000, Dalit nung 60,000, upper castes 77,000, Bhuminars 45,000, Rajput nung 16,000 aser Brahmin nung 6,000 shi lir.



Taoba hopta Hajpur ditrict nung police-i advocates dak azükba anema September 04, 2023 nü Prayagraj nung Allahabad High Court nungi lawyer temi longkak aitba noksa nung angur.

Mongolbarnep 7:00 ako nungi by election agitsü aser nikongdang 6:00 ako nung polling tembangba sülen September 8 nü vote azüngtsü.



TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI (SEPTEMBER) 05, 2023

District ya shibai repranger ?

Nagaland nung ya nütsüng aser ali tasazük dak malang district aika kümogo saka district teimbaka kibur mali amato akümba angur. Atangji, Nagaland nung district akümba ya nütsüng yongsük aser ali tasazük apia masü saka kin apia district balala aküm amai Nagaland nung Naga nung kin shia amato district kaka kuma lir, anungji kin aser ali kibur tsütsü bilemdangra, district shiaji pei kin aser pei nübortemji kibur asütsü. Ajisüaka, state inyakyim nung yimten tsütsübo ali kiburtemji district kibur masü, parnokji nübortem, anungji parnok reprangtsü atema state government-i yokba tongti ketdangser ka lir, aji Deputy Commissioner aser pa mesüra laji dang district nung tokolak, anungji yimten nung district madak kiburji DC asütsü. Atangji, Deputy Commissioner ta asüba ya District Commissioner ta melenang tetezü angatet-angateta inyakla ta bilemer, kechiyong district nung government department-tem office kechisa lir, item ajakji repranga inyaksü atema yokba tongti ketdangserji Deputy Commissioner lir. District ka nung MLA aika alitsüa akok, ajisüaka parnokji constituency kaka nungi, anungji state atema ozüng yanglurtem süaka parnoki pei constituency asoshi tebilemba bilemte, anungji tenüng agibo state nung yimsüsür saka mapa agibo constituency ka nung dang tokolak amai inyaker. Aji oda, anogo shia teinyaksü wadang asadangra MLA dang nungibo DC teinyaksü teimba lir. Iba jagi aiben nübortem pei DC ajurunüaka majurutettsüsa anogo shia senden amenba asenoki tenjitsü. Ajisüaka, DC ka asoshi kilong nung anogo shia senden amenbaji masü saka senden nung lemtetbatemji kimai adoka nübortem ajangzüksüsa inyaksür asü meinyaksür ta asübajiang tongtibang asütsü. Aji oda, pei district nung office shia nung tokolak (Head of the office)-i anir mapa shitak inyaker asü meinyaker ? Mozü kitem nung nübortem teyari angur asü mangur ? School-tem koma odar ? Kechiba yimti yimdong lenmang anepalu masür ? Kechiba National Highway lenmang aturtemi nübortem timtemtsüsa lenmang raksaa yutsür ? Kechiba light aser tzü junga mangur ? itemji shirnok, koba department mapa ta asüba tebilemte agi nübortem timtem takoksa ajurua lira, tangar shinga ola madokdangyong DC-i tama reprangteta inyaksü tim. District nung DC-ji District Commisisoner dang masü saka District Inspector amai asütsü tim. Aji oda, ita shia District Planning & Development senden amen shia district nung office shia nungi tokolak purtem dang nungi 'monthly action taken report' meshitsüla. Iba jagi office kecha nunga mapa maka ta ser mekazütsü aser iba jagi office shia nung ketdangser ali mali metettsü. Tangbo, tanga district-tem otsübo yutsür Mokochung nung dena office karbo inyaker kata office-i maruba otsüa angashir. Ano, Municipal alidak Urban Development office nung tokolakba dena küm junga mali toktsübaji Mokochung mezüngshiba mapa ka asütsü. Mokochung nunga government office-tem iba tia nung alinungbo, tanga district-tem nungbo komaka alitsü ? Item timtem aser metokmeperibatem ajakji DPDB senden nung DC-i benoktsüla. Ibajiang DC nungi 'monthly action taken report' asütsü. Idangjiang district nung yimsüsür aser lokti lenirtemia pei district tia indang tajungba metettsü. Iba amaji ka mesüi, District nung government office-tem kechi-koma jenjang ka nung aliar memetet yutsür, DPDP senden nung Society Registrations amala onük dang jembir senshira, ashiko asungbo District nung DC maliba otsüang jembitsüsa akümte. Iba amaji mesüi DC-ia DC mapa meteta District meima anepalutsüsa yimten yimsüsür aser lokti lenirtemi shisa tajung agüja ajungshia alitsüla.

OLEMSABANG

TANG INYAKYIM YAGI TARUTSÜ KHRISTAN YIMSÜ ANOKSHITSÜ

~ P. Senti Tzüdir, Executive Member,
Nagaland Pradesh Congress Committee

Asen tamangba yimsü aser asen sobaliba kümzüka ayutsü asoshi tongpang nung Arogo aser Yimtsüng yimden yimsüsürtemi taküm/mapang intok mesasai inyaker.

Iba ama mapang ka nung kechi tangatetba nung Shri N. Rio, Nagaland State Chief Minister aser Shri Temjen Imna Along nung-er anir Rakshabandhan, koba Hindu nung Tamangba yimsü nung kanga dang metsüngareta amungba Benjungmong mapang Nagaland State-i arua iba Tamangba yimsü alak- alema tsümatsür ka nem pei takabo nung rakhi angüsü alendaktsü? Iba ama tia ka nung tamangba yimsüi memelaba mapa inyaker. Ibaji aseni külemba aser amangba yimsü nung laishiba memelar masü na? Anungji arogo nungi atsüngtsütsü tim ta nibo angateter.

Item ama lenisüba nung Naga kin rangben anisadaktsür masü no? Angami nung chanu Shri N. Rio, Nagaland State Chief Minister Angami nungba otsüji khen yangi anena toktsür. Saka kanga dang tesasatsü kaji asen Aor Shri Temjen Imna Along shiba maneni state nung Minister ka ama inyaksü Tsüngremi maangka agütsünung kechiba ya tashi sayangtet? Pa indang Constituency kodang repangdir tang tashibo Molungkimong/ Yimjenkimong yimtsüng dena lir, anungji pai Molungkimong yimtsüngji akhümtebuttsü tim liasü, Khristan yimsü mechi nung.

Tsürabur mapang Bodhbar aonung pei yimdaki matoki alu nung yipra (Alu nung mejangra) Arogo ajanga tasüngdangba tulu liasü (Nangzükdaktsü) aser angateta shir, ano maneni aibelenra Arogo nungi atsüngtsüba otsüji tanü iba putu tashi taküm lir.

Süra iba dang nungi tuluba aibelen koba Khristan yimsü nung mapetba Hindu tamangba yimsü ajanga bener aru, itemjibo Arogo nungi atsüngtsütsü langa lir masü na?

Küm shia Nagaland State yimtiba Kohima nung benshia aruba asenoki media balala ajanga angur, saka local Arogotemi MLAs aser Minister-tem dang tasü ita asüngdangya mesüteter. Saka tanü aseni külemba yimsü nung pa-bo tular aser pa/la bo tilar ta shimdanga inyaker masü na? (Arogotem ajaki inyaker ta mashir), saka kari yamaji inyaker.

Arogo aika nung tulursang mesüra takarsangtem tenla kidang tejaklen atua yakpang süa mendaktsür, anungji maka maitertem mesüra tilartem tenla kidang koba tsünglanglen menden tokja lir parnoki tsünglanglen amentsüsa akümer.

Yamaji ano kasa tenla kidang arogo züngsem aikati ya kü tamendak aser ya kü menden ama kibur küm di asür, saka laishiba nung iba ama nütsüngtem rongnung menden kibur akümte sayua mali. Hao, Arogo nung sannüker/sannükla/tenzüker tenzüklatem aser choir asoshibo menden telatet toktsür. Saka Arogo nung VIP/VVIP bendangsa amshiba inyakyim nungi anenadoktsü junger ta kü tangatetba iba sabang ajanga mepishia lemsateper. Aser iba inyakyim ya Arogo ajaki inyaker ta-a masü, saka Arogo kari iba ama bendangsa-a inyaker.

Anungji iba ama inyakyim nungi joko anenadokdi ta iba sabang ajanga lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pakistan kübok Jaranwala nung pastor ka khasetsü merang



September 04, 2023 nü Pastor, Eleazar Sidhu Faisalabad yimti nung aliba Civil Hospital nung amongdang tangokba noksa nung angur.

Faisalabad, September 04, 2023 (Agencies): September 3 nü nisung kari Pakistan kübok Punjab province nung Protestant pastor ka khasetsü merang; hopta ana tejaklen iba tesem nung Muslim nungertemi Tenla ki aika rongdokja liasü.

Punjab province nung Jaranwala kübok Rehmat jila nung September 3 nü nisung kati Pastor Eleazar Sidhu khasetsü merang, ajisüaka injang agi pa tapubang dang yirua liasü.

August 16, 2023 nü Jaranwala jila nung Muslim nung telok kati Tenla ki 21 den Khristantem meyong ki 400 shi rongdokja liasü.

Arrshi küm 35 pastor, Sidhu ya Myong-Sang (meditation) Nasreth Church nungi lir. Pa injang agi yiruli Punjab province kübok Faisalabad nung aliba civil hospital-i anir ao.

Iba tatalokba sülen police-i tang tashi nung nisung ka danga mapu.

Osangbenertemi Pastor Sidhu den jembitsü merang, ajisüaka pa temang majungba agi pai osangbenertem den jembitsü memelungi liasü.

Pastor-i ashiba nung ajemdaker September 04, 2023 nü police-i, pastor Sidhu anasa aliba yimtsüng ka nung sarasademba sülen meyipa aruba mapang nung bangsomo keta alir kati pa dak injang khaloktsü, ta metetdaksü.

Pastor-i, "Iba nisungba jagi kü dang 'kalma' (Islam yimsü tenangzükba) zügang ta ashi. Ajisüaka ni Masih (Khrista) indang kalma azüng tenzük. Idangyongjisa pai kü dak injang khaloktsü," ta ashi.

"Ozü kibong, özü nüburtem aser özü Arogo züngsemtem tetsübu nung lir," ta pastor-i police dang ashi.

August 16 nü Muslim nung lokti kati Jaranwala nung Tenla ki aika

rongdoktsüba aser Khristantem meyong ki aika rongdoktsüba tatalokba dak sendakba nung pastor-i, "Anogo ishika jakdang Jaranwala sub-division nung ki aika rongdoktsüogo. Onok (Khristantem) iba linük nung tetsübu makai alitsü atema melatsüla aser onok yaritsüla," ta ashi.

August 28 nü Pastor Sidhu-i par Arogo Tenla kidang Islam yimsü dak sendakba otem zülusaja aliba atema pai tashishiba ken o agüja liasü. Tenla ki jara nungji Tehreek-Labbaik Pakistan (TLP) telok indang yimyim balala zülusaja liasü.

Tenla kidangji "Muhammad ya tesüsabuba ainkar lir" aser "Vicky (pastor Sidhu) ya atakatemogo" ta zülüja liasü. Tesülen police-i item oji aidoktsü.

"Anogo asemnü lir ni özü jabaso school-i meinokja liasü. Bangsemo keta alir nisung kari kü dang 'Pastor Vicky, onoki Tenla ki jara nung zülua toktsüba otem nai aidokogo, saka onoki na iba lima nungi aidoktsü' ta ni amokmerena liasü," ta pastor-i ashi.

Jaranwala nung tatalokba atema tentetba Christian Joint Action Committee nung convenor, putir Khalid Rashid Asi-i sangdong ka ajanga nisung kari pastor khasetsü merangba aitsüogo.

Rashid-i, linük nung tensa tamajungba dang akümer aser taremzüktep samaogo, ta ashi.

September 4 nü osangbenertem den jembidang Rashid-i, "TLP ya Arogo aser linük atema amokmeren ka kümogo. Police-ia parnok tsübur," ta ashi.

Paisa, ketdangsertemi Tenla kitem nung police guards toktsüogo saka parnok ket nung prangpong mali, anungji parnoki onok koma kümzüktsü, ta ashi.

September 4 nü joint action committee senden nung adener aser Khristan temeden atema inyaker, Lala Robin Daniel-i, Pastor Sidhu khasetsü merangba atema police-i mejangjaba nisungtem anema ken o benokner, ta metetdaksü.

Jaranwala nung pastor tem tenüng nung police-i Tenla kitem nung Quran raksatsüba atema ozülü balala toktsüogo.

Police aija Daniel-i, "Iba tensa ya tamajungba dang akümer. Police-i tesempatsü shilem agir aser parnok tamakok nembangtsü meranger. Police-i Tenla kitem nung ozülü toktsütsü menüngdak. Laishiba noklang aika rongdoktsüba atema parnoki (police) kechi inyak. Parnoki shinga menokdangteter," ta metetdaksü.

Khristantemi Muslim nung temeshi kakat 'Quran' raksatsüogo, ta tai tonglokja August 16, 2023 nü Muslim nungertemi longkak aita Tenla ki aika rongdoktsü.

Khristan ana- Raja Umar aser Rocky Masih nati Quran mezüngmeshiba ajanga Tsüngrem atalaogo, ta tena nem tai tongloktsü.

Ibaji anema Faisalabad district nung aliba mosque ka nungi dokantem shibangtsü sangoktsüba sülen Muslim nung lokti jagi Basti Maharanwala kiyong mezüng maaka liasü.

Muslim nütsüng teimba aliba Pakistan linük nung Tsüngrem mezüngmeshiba ozüng kübok Khristantem aika nem tai tonglokja reshikangshir. Islam yimsü mezüngmeshiba ken o nung aitsürtem nem tasüba temerenshi-a agütsütsü akok.

Nütsüng million 207 aliba Pakistan linük nung nütsüng shilem 1.27 dang Khristantem lir, aser Khristantemji teimbaka Punjab province kübok lir.

ANOGO ABEN TSÜNGREM DEN

Tsüngremi mulungba

Anitet 20:8-11

asen mapang amshiba

Aser Pai parnok dang ashi, "Nenok azüngmeyakdaki pilaa arung, aser kenpika anisüngzükang kechiaser aika oli aruli ta liasü, aser parnok chiyongtsüa mapang maka. Mark 6:31.

Management company kati nisung arishi küm 75 nung mapang indokba yamai lemsamejangba mapang küm 23; mapa inyakba mapang, küm 19; asayaba mapang, küm 9; ainlen jajaba küm 6; chiyongba küm 6; line nung ataba küm 5; ki merük mejuba küm 4; chiyongtsü renemba küm 3; telephone nung jembiba küm 2; oset jaka shidak nung meyui bushiba küm 1; shiti aruba lapokba, ita 8; amenba, ita 6; tekülem ita 6; aser sarasadem nung anogo 19.

Asen Kibubai asenok asoshi anisüngzük aser Pa tenüng sanga anisüngzüka Pa den mapang indoktsü asoshi anogo ka balaka shitetta ayu. Khristai sarasademtsü aser anisüngzüktsü asoshi mapang balaka agi. Asenoki mapangji koma amshir reprangdangang. Sarasadem temtsünglen aser Lai bushiba keni mali. Mapang mali ta asenoki nemnemer. Tongtipang mapa masüba asoshi asenoki mapang agütsür. Asenoki Khrista inyakyimji anidakra, asenoki sarasademtsü aser Lai bushitsü mapang agitetta yutet.

Ajak dang alia, kodang asenoki Kümtetdakba den tejak o tejak na chitepa ajuruteptedir, asenoki sarasadem aser Lai bushiba nung mapang indoktsü.

Temem Khrista, Ne den onoki mapang indoktsü yariang. Amen.

US-i China dang Khristan lawyers aser Arogo lenirtem chioktsü mepishir



Zhang Kai

September 04, 2023: US-i China ketdangsertem dang Khristan lawyer tem aser Arogo lenirtem tepuokdak nungi chiokang, ta mepishiogo.

Religious Freedom ketdangser, David Saperstein-i taoba Bodhbarnü Khristan temeden atema inyaker lawyer Zhang Kai aser tangartem ajurutsü tebilemba liasü, ajisüaka pai parnok majurudangyongi China ketdangsertemi parnok apu.

Zhang Kai indang lawyer-i, linük security anema inyakba aser loktiliba nung timtem adokdaksüba atema pa apu ta ketdangsertemi metetdaksü, ta

ashi.

China kübok Zheijiang province nung Zhang Kai-i Khristantem temeden atema inyaker. China nung Zheijiang province dang ya 'Anüdoklen Yirusalem' ta ajar, kechiyong iba province nung Khristan nütsüng kanga arener.

Zheijiang densema China tesem balala nung ketdangsertemi Tenla kitem nung Kangki raksatsü tenzükogo aser tesem kar nungbo Tenla kitem-a raksatsür.

Osangbener den jembidang Religious Freedom atema US ketdangser, David Saperstein-i, "Ketdangsertemi nüburtem atema jembitsür lawyers, internet temeden atema inyakerterem, osangbenertem aser yimsü lenirtem apur. Ibaji ajanga China nung yimsü temeden anema inyakba kuli tejangja sayur," ta metetdaksü.

"Iba ya asenok asoshi tebilemstü tuluka lir aser onoki sorkar dang tangsa meimchir temeden atema inyakerterem aser yimsü lenirtem chioktsü akhanger," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Sadoksadoka

(adj) tarendak mali sademsadema bilemba (feeling free)

*Sünepebaer kidangbo nisung ajak **sadoksadoka** kazür.

Sadoksanem

(adj) mapa inyakba sülen anisüngzüka pelatepba (enjoy after work)

*Tanübo onok ajak **sadoksanema** kidang amung.



OLONG PAITEP # 6626

	1	2		3		4		5
6							7	
				8		9		
			10					
11								
				12				
13	14		15					16
17							18	

TIPLÉN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S ____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ____ hi - (3)
- 16. Akümüli nungi pilar - (3)

OLONG PAITEP # 6625 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.



TANTSÜ O TAMBU NA TETI

RARAPANGSENA DANG LIR TANTSÜ SÜADOKER TAMBU TO SANGREMER AKÜM NUNG PASTOR DEN SENSACK ASEMER :

Sangremer : Pastorba, ozü tantsü tanüla ya naia kobai ao ama pilemer, kodak asü molumi?

Pastor : Yaa, kodaki odija, la akümlidang kanga meranga sentepia aru, tenla tenjia shitak aben aser Tsüngrem den teti jajaba tetsü asüji labo kodaki ogo nii.

Sangremer: Sürapangla kü dang molumi-i aotsüang tasa kar shiangma.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tanü Tripura constituency 2 nung by-election agitsü

Agartala, September 4, 2023 (Agencies): September 5 nü Tripura nung Dhanpur aser Boxanagar Assembly Constituency ana nung by-election atema maparen renemogo.

Bharatiya Janata Party (BJP)-i constituency anaprong nung nüboyimba sentong tulu inyakogo. Parnoki rally, road shows aser door-to-door campaigns agiogo.

Tripura Chief Minister Dr Manik Saha-i anir minister tem, MLA tem aser BJP lennirtemi kanga meranga

inyakogo. Dhanpur constituency nung BJP candidate Bindu Debnath aser CPI(M) candidate Kaushik Chanda na tsüngda tokteper.

Boxanagar constituency ya Left party tashi ita aliba tesem ka ta züngshir aser iba nung BJP candidate Tafajjal Hussain-i CPI(M) candidate Mizan Hussain den tokteper.

Boxanagar nung CPI(M) MLA Samsol Haque asüba ajanga by-election agir aser Dhanpur nung Union Minister Pratima Bhoumik-i MLA

menden toktsüba ajanga agir. CPI(M) politburo member Manik Sarkar aser CPI(M) state secretary Jitendra Chaudhury nati anir party lennirtemi pei pei candidate atema kanga meranga nüboyimogo.

Ajisüaka, iba election nung Opposition political party tem-Tipra Motha party aser Congress-i shilem magitsü lemtet.

September 5 nü polling asütsü aser September 8 nü votes azüngtsü. Boxanagar nung polling stations 51 aser Dhanpur nung 59 lir.

Assam CID-i taoba Bajali SP Buragohain apu

Guwahati, September 4, 2023 (Agencies): Assam police indang criminal investigation department nung taoba SP Siddhartha Buragohain puogo.

Ochimashi ken o ka nung taoba SP Siddhartha Buragohain apu. Tesüiba nung CID-i Buragohain jaoka asüngdangyaogo.

Guwahati, Assam nung CID headquarters nung pa dang asüngdangyaba sülen pa apu.

Taoba Bajali SP Buragohain ya transfer asü aser Assam police headquarters, Guwahati nung pa mapa lezmükja liasü.

Iba ken o dak sendakba nung Bajali DSP Puskal Gogoi, assistant SP Gayatri Sonowal aser la kinungbo Bobby Singh Sharma nung CID-isa puogo.

September 1 nü Assam police CID ajanga nisung 7 apu. Parnok rongnung Bajali police kettangsür 5 aser driver 2 dena lir.

Bajali police nung kettangsürtemji Dy SP (HQ), Bajali Puskal Gogoi, O/C, Patacharkuchi PS SI Anup Jyoti Patiri, i/c Bhawanipur OP under Patacharkuchi PS SI (P) Debajit Giri, Patacharkuchi PS ASI Sasanka Das, PSO Smti Gayatri Sonowal ABC Injamamul Hassan aser taoba Addl SP (HQ), Bajali.

Iba ochimashi mapa nung shilem agiba driver anaji Deepjoy Roy aser Nabir Ahmed na lir.

Manipur nung Retd. Army kettangsür kati SSP inyaker

Imphal, September 4, 2023 (Agencies): Manipur sorkari tensa aziüoktsü merangba mapa nung retired Army officer kati tngti shilem agia yariteptsü.

Manipur sorkari küm pungu kümsük atema Colonel (retired) Nectar Sanjenbam-i Manipur police department nung Senior Superintendent (Combat) inyakttsü shimogo.

2015 küm India-i Myanmar nung 'surgical strikes' inyakba nung Colonel (retired) Sanjenbam-i tongti shilem agia liasü.

Army officer Sanjenbam-i 21 Para (Special Forces) nung inyak aser pa nem Kirti Chakra (second-highest peacetime gallantry award) aser Shaurya Chakra (third highest peacetime gallantry award) agütsüogo.

Manipur joint secretary (home)-i August 28 nü sangdong ka agütsüba nung "June 12 cabinet lemtet sülen nisung shimoker" ta shia liasü.

Manipur nung N Biren Singh-i aniba sorkar aser Centre ajanga Manipur nung tensa aziüoktsü merangba mapang ka nung Colonel (retired) Nectar Sanjenbam shimogo.

Bhaichung Bhutia-i SDF nung adentsü akok

Gangtok, September 4, 2023 (Agencies): India nung football asayar mongin Bhaichung Bhutia-i Sikkim Democratic Front (SDF) nung adentsü.

September 22 nü Bhutia-i SDF nung züngsem akümtsü akok ta osang angazüker. Iba anogo ya SDF tanishir Pawan Chamling tasoba anogo ka lir

aser party-i sentong tulu ka ayongzüka lir.

Sikkim nung political lennir aikati SDF nung adentsü imlar.

Iba mapang Bhaichung Bhutia-i par Hamro Sikkim party SDF den lokteptsü asü masü mejangja. Bhaichung-i Hamro Sikkim party nung president inyaker.

Taküm July ita Hamro Sikkim Party (HSP)-i Indian Constitution 8th Schedule nung Lepcha oshi enoksemtsüba takhangba pusema nungit.

"Sikkim nung jembiba oshi ajak akhümtsübuttsüla aser agizüktsüla ta Hamro Sikkim Party (HSP)-i amanger" ta parnoki metetdaksü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND:KOHIMA**

No. DTE/MIN/4/2022/6

Kohima, dated the 4th September, 2023

PUBLIC NOTICE

In continuation of the Notification of even number dated Kohima 8th August, 2023, this is to inform students who have applied for Post-Matric Scholarship and Merit-cum-Means based scholarship scheme for the session 2022-23 under Ministry of Minority Affairs, GOI through National Scholarship Portal that the Ministry has allowed to authenticate the Bio-Metric of students outside their Institute District/ States.

2. Students who wishes to authenticate their Bio-Metric outside their Institute District/ State will be given one time irreversible opportunity to opt for this facility from 04th September 2023 to 6th September, 2023 (11.00AM- 7.00PM)in theirNSP login.Students will have to choose State / District of their choice and shall have to upload documents as reflected in the NSP.

3. Students are advised to avail this facility carefully as once they choose to Authenticate outside InstituteDistrict/State they will not be able to authenticate at the institute.

4. Interested students are directed to report on 7th and 8th September, 2023 at the Conference Hall of the Directorate of Technical Education, Kohimafor Bio Authentication.

5. HOI/INO of the Institutes are advised to take special care in re-verification of these applications

6. For any query one may call the helpline number+91-9233959973 or mail to dtenagaland@gmail.com

**(ER.VIPULHOU LHOUNGU)
DIRECTOR.**

G20 senden nung Xi madentsü, Biden mepelar

Washington, Rongjui/September 04 (Agencies): India nung agitsü aliba G20 senden nung China Tir Xi Jinping madentsü sentong aliba mechi mepelar, ta US Tir Joe Biden-i ashi.

"Ni mepelar... saka ni pa ajurutsü," ta Biden-i osangbener dang Deobarnü ashi saka kodang ajurutsüar ajibo mashi.

Tan hopta Delhi nung amentsü aliba senden nung China indang delegation ya Ato Kilonser Li Qiang-i anir aotsü, ta Beijing-i Hombarnü metetdaksü.

Xi aser Biden ya tatema ajurutebpa ya taoba küm Indonesia nung G20 summit nung liasü.

Jembishinü asendenshitsu

mechi taküm Washington nungi ketdangsür aikati Beijing semdangaka US-China tesendaktep mejungi lir.

Hombarnü osangbener senden ka nung asüngdangba mapang China indang foreign ministry ajanga Delhi summit nung Xi adentsü mesüra madentsü kecha mashi.

"G20 summit nung adentsü asoshi Chinese delegation ya Li Qiang-i anir aotsü. Ibai alima nung rongsenketzung tentet tongtipang lir. China teti yangji temolung agütsür aser iba dak sendakba sentongtem nung shilem agia arur," ta foreign ministry indang odongtar kati ashi.

Ajisüaka taoba hopta osang kar ajanga Xi iba

senden nung adentsü sentong mali, ta shia liasü.

China aser India tsüngta tesendaktep tamajungba akumba mapang ka nung iba osang ya angashir. Danga aika rongnung linük ana ya Himalayan region nung arütsü tsütsü mangatetep adoka lir.

Taoba hopta ang Beijing-i map ka sayaba nung Arunachal Pradesh state aser Aksai Chin plateau ya China nung ama shia aliba mechi India-i anema nokdaka liasü.

Xi aser Biden na ya November ita jembitsü maongka arutsü akok, kechiaser iba ita nungya San Francisco nung Asia Pacific Economic Cooperation lenirtem senden amentsü.

(Maneni tapak 8 nung...)

Gabon tir inyaksü Brice Nguema shimogo



Libreville, Rongjui/September 04 (Agencies): Gabon mitkar lenir Brice Nguema ya linük nung khen atema tir inyaksü azüngashitepogo.

General Nguema-i anir taoba Bodhbarnü mitkar temi tashiyim amshia Ali Bongo atsüngdoka liasü, koba mangatetep aliba election nung pai takok nguogo ta sangdonger mapang tatsüka tsüngta atalok.

Nguema asüngashitebpa

sentong nung civilian aika pelashisa arua aden, anungji mitkar bhukumer aliba sayur.

Ajisüaka Gen Nguema-i yimsü asüba ya Bongo dynasty küm 55 tashi aliba den kasa alitsü südi ta shisabolur.

Ali Bongo tebo Omar yagi küm 41 yimsü sür 2009 küm asü aser par jabasoi pa melen.

General Nguema ya mapang talangba Bongo'er telok den indok aser pa ya Ali Bongo'er kinunger asütsü südi

ta bilemer.

Hombarnü inauguration nung military parade ka liasü, koba Gabon yimtiba, Liberville nung tir aliba kidang agia liasü.

Mitkar lenir tasenba saportem iba sentong nung dena liasü. Tang sorkar atsüngdoker aliba nungi taoba minister tema iba sentong nung aden, saka mitkar meimer temi tejashi ola agüja liasü.

West aser Central Africa nung mitkar temi sorkar atsüngdokyonga aruba rongnung Gabon ya tesüsaba alitsü.

Küm asem tsüngta Francophone linük mitkar yimsüsüba küboki aiter rongnung Gabon ya trok buba alitsü aser taoba mapang yimsü süa aliba France-i iba continent nung sentsü sayutsü makoker.

Mitkar temi sorkar atsüngdokba sülen Gabon ya African Union nungi khen atema anenja lir, koba UN aser France-ia aitsü.

Pakistan nung TTP züngsem 8 tepsetogo

Islamabad, Rongjui/September 4 (Agencies): Balochistan kübok Quetta aser Washuk district nung Honibarnü meita aoba sentong ana ayongzüka agiba mapang Tehreek-e Taliban Pakistan (TTP) aser IS telok nungi züngsem ti tepsetogo, ta Pakistan indang Counter Terrorism Department (CTD)-i sangdongba Dawn-i metetdakja liasü.

Meita aoba mapang CTD ketdangsürtemi telungpurtem tesep nung parnoki por aoba nisung ka kümzüka liasü. Iba nisungba ya ita ka tejakdang por ao aser pa tetsüng aser teka alener takdang ka nung yua liasü.

CTD ketdangsürtemisa iba tesem nung submachine gun, hand grenade, 9mm pistol, detonating cord aser explosive tem ngutea liasü. Iba dak

sendakba nung ken o ka benokogo aser bushisüngdang südar, ta otongdar kati ashi.

Tehreek-e-Taliban Pakistan's (TTP) aser sorkar na tsüngda taoba küm November ita ceasefire tembangba sülen kiralongrar inyakyim timba akümba ajangshia arudar aser talisa iba ajanga Khyber Pakhtunkhwa (KP) aser Balochistan kongshio.

August ita kija nunga Pakistan nung kiralongrar inyakyim shilem 83 agi timba kümogo, ta Pakistan Institute for Conflict and Security Studies (PICSS)-i bendenba report nung shia lir. August ita kiralongratemi linük kübok tesem balala 99 amakba mangaoka lir. 2014 küm November ita sülen tang mezüngbuba ita ka nung kiralongratemi tesem timba makogo.

Taküm July ita tesem 54 maka liasü aser iba den medemdangra August ita shilem 83 timba akümba data ajanga sayuogo. PICSS report ajanga suicide attacks pezü tashi atalokba metetdaksüogo.

Ajisüaka data ajanga tesem balala ya kwi TTP puri amak aji mejangja, saka parnoki süang tanga teloki süa Pakistan nung civilian aser ketdangsürtem amakba tali kümogo.

2023 küm ita ti tsüngda suicide attacks 22 atalokogo, kong nisung 227 süogo aser nisung 497 yiruogo.

PICSS data ajangsa security force temi jenjang tapet agiba sayuogo. Security force temi telungpur 24 tashi tepseta lendong ataloktsü aliba aika nokdangogo aser meita aoba sentong balala ayongzüka agiba mapang telungpur 69 puogo, ta Geo News-i metetdaksü.

**IMPUR CHRISTIAN HOSPITAL
ANM SCHOOL OF NURSING
IMPUR : MOKOKCHUNG, NAGALAND**
(Permitted by State Nursing Council, Nagaland & Recognised by the Indian Nursing Council).
NO : ICH/NS/GEN-1/2021 Dated : 2nd September 2023

ADVERTISEMENT

Applications are invited from the unmarried girls for undergoing 2 years FHW/ANM course at the ANM School of Nursing, Impur Christian Hospital, Impur Mokokchung (recognized by INC) for the session 2023-24.
The following particulars are given for information of interested candidates :

1. The session will start from October 2023.
2. The last date for receipt of the application is 18.9.2023.
3. Prospectus and Application form will be available from Impur Christian Hospital, Impur Clinic Mokokchung, Cornerstone H.S. School Dimapur on payment of Rs. 200/- or can download from impurchristianhospital.org
4. Age : 17 - 25 years (as on 30.09.2023)
5. Qualification : Class 12 pass in any stream with 40% from recognized English Medium School Board, 45% from recognized National Institute of Open School.
6. There will be written and viva test (dates will be notified later)
7. No. of seats - 20

**Sd/- Medical Superintendent
Impur Christian Hospital**

**SANGTAM LARU THSINGMUJANG
MOKOKCHUNG LIYONG
RAFFLE DRAW RESULT
Drawn on 2nd Sept 2023**

1st Prize No. 0975, 2nd Prize No. 1024,
3rd Prize No. 1285.
Consolation prize: 0749, 0095, 1337, 2137, 0846,
1224, 0796, 1232, 0061, 0181

Contact: 9612733392

NO. AR/DEV - 2/2023/ Dated, Rongjui 4, 2023

SANGDONGER

Tawa Ao Riju ajanga agiba Arangtet Tatidang Mark Sheet koba Rongjui (September) 4, 2023 anogo agütsütsü sangdongogo, ibaji maparen kar metemtetba ajanga thinener Rongjui 10, 2023 anogo nung agütsütsü. Iba den külemi, Mark Sheet agizüki arudang ne nem agütsüba original Admit Card den noksa ka (Stamp size) bener arutsü mepishir.

**Sd/-
(S. Wati Ozüküm)
Tongti Zülur**

Russia-i North Korea & China den navy exercise ka agitsü benok

Seoul, Rongjui/September 4 (Agencies): Russia indang defence minister-i, North Korea indang lenir Kim Jong Un dang China den külemi par linük ana naval exercise ka ayongzüka agitsü benokdangogo, ta South Korea indang intelligence agency-i ashiba South Korea indang Yonhap news agency sangdong ka ajanga metetdaksü.

July ita Korean War tembangba sülen küm 70 ajungba anogo North Korea nung "Victory Day" ama ayongzüka amungba mapang Russian Minister of Defence Sergei Shoigu-i North Korea semdanga Kim den ajurutepa liasü.

Tenati defence exhibition ka nung shilem agi, kong tenokdangba agütsür aliba North Korea indang ballistic missiles tema saya liasü, ta iba mapang Korean state media sangdong ka ajanga metetdaksü.

Yonhap-isa, Shoigu-i iba linük semdangba mapang Kim dang linük asem longjemer naval exercise ka ayongzüka agitsü atema benoka liasü, ta metetdaksü, ajisüaka osang tejangja magütsü.

South Korea indang National Intelligence Service-i National Assembly dang ashiba agi,

military inyakyim atsülangshitsu atema Shoigu aser Kim na jurila senden ka menogo.

Russia aser North Korea nati tawa military inyakyim akangshitsu atema bangjemogo, ajisüaka North Korea-i ashiba agi, parnoki Russia dang prangbong hadir kecha mayoker.

White House national security otongdar John Kirby-i taoba ita osangbenertem den sensaksemba mapang Shoigu-i North Korea semdangdang parnok dang artillery ammunition ayoktsü atema asüngdanga liasü, ta ashi.

North Korea aser Russia na tsüngda pranbong hadir balala tsütatepba nung sendaka aliba lokti tentet asem nem United States-i tawa tenokdangba agütsüogo.

North Korea-i 2006 küm nungi nuclear trok tashi tendangogo aser küm ka ana tsünga missile aika tendanga arudar, ajisüaka parnoki kidanger linüktem den military exercise bo ayongzüka magir.

Kasa mapang nung United States aser South Korea nati tawa military exercise tem kanga atonga ayongzüka agia arudar, koba North Korea-i ashiba agi parnok amaktsü atema terenemshiba ka lir.



SVEEP sentong nung shilem ka ama Chumoukedima jila local ground nung September 1 aser 2 ta anogo ana atema angati football camp ayongzuka agiba mapang CEO Team aser District Team na exhibition asaya ka asayaba mapang tangokba noksa nung angur.

Asian Championships: India tebur TT team-i bronze medal bosa angutsü jangjaogo

Rongjui/September 4, 2023

(Agencies): Asian Championships nung Hombarnü quarterfinals nung Singapore akokba sülen India tebur table tennis team-i bronze medal bosa angutsü jangjaogo.

Team asaya nung mezüngbuba asaya ya Sharath Kamal aser Izaak Quek na asaya liasü, koba India nung asayar yagi 11-1, 10-12, 11-8, 11-13, 14-12 agi koka liasü.

Iba sülen tanabuba kija asaya nung G Sathiyani 11-6, 11-8, 12-10 agi Yew En Koen Pang koka India 2-0 agi tejakdang aküm.

Tasembuba asaya nung Harmet Desai-i 11-9, 11-4, 11-6 agi Zhe Yu Clarence Chew koka parnoki iba quarter final asaya koka liasü.

Seed tasembuba nung aliba India team ya semifinal nung Iran mesüra Chinese Taipei den asayatsü. Tebur team yagi küm ana tejakdanga Doha nunga bronze medal nguogo.

Mapang talangka lir Sharath aser Sathiyani na kija asaya nung top-100 nungi tuguogo aser iba asayamung kija asaya nung junga asayatsü imla alitsü.

Points system yanglushiba aser asayamung aika nung shilem magiba ajanga tena rankings nung jenjang asepzüka aluogo.

Tetsür quarter final asaya nung seed pongububa nung aliba India team 0-3 agi Japan team-i tsükdaktsüogo.

Mezüngbuba asaya nung World number 8 asayar Mima Ito-i Ayhika Mukherjee 11-7,

15-13, 11-8 agi ayong ayonga akok.

Iba sülen world number 36 asayar Manika Batra aser world number 7 asayar Hina Hayata na asaya koba Hina-i 7-11, 9-11, 11-9, 3-11 agi koka liasü.

Tasembuba asaya nung Suthirtha Mukherjee-i junga asaya tenzüka mezüngbuba game bo akok saka lai Miu Hirano 7-11, 11-4, 11-6, 11-5 agi mekoki liasü.

Iba asaya nung tamakok anguba sülen India team 5-8 position atema Mongolbarnü classification match tem asayatsü.

Iba continental asayamung ya September 23 nü nungi tenzüka asayatsü aliba Hangzhou Asian Games jakdang asayadaki.

Russia & Belarus nunger asayartem Asian Games nung masayatsü: IOC

Rongjui/September 4, 2023

(Agencies): Russia aser Belarus nunger asayartem iba ita China nung asayatsü aliba Asian Games nung shilem magitsü. International Olympic Committee-i iba sentong ya tamakoktsü ta asatetba sülen tang iba telemtetba agiogo.

2022 küm February ita nungi tenzüka Russia-i Ukraine amakba sülen linük ana nungi asayartem asaya balala nung shilem magidaktsi arudar, ajisüaka kija asayartembo tenokdangba

balala agütsür asayadakja arudar.

International Olympic Committee (IOC)-i taküm küm tetenzüklen, asayartem Paris 2024 Olympic Games nung shilem agidaktsütsü atema lenmang bushitsü nüngdaker ta shia liasü.

July ita bangkok nung Olympic Council of Asia General Assembly amenba mapang Olympics atema qualify asütsü asoshi maongka agütsütsü atema iba linük ana nungi asayar timba agi 500 nem shilem agidaktsütsü

asoshi vote agüja liasü.

Ajisüaka IOC otongdar kati Deobarnü ashiba agi, "Russia aser Belarus indang passport bena aliba asayartem Asian Games 2023 nung shilem agidaktsütsü atema 2022 küm December ita Olympic Summit nung lenmang bushia sensaksemogo, ajisüaka technical tsütsü tetsükdaktsü aliba ajanga iba ya tamakoktsü lir."

Asian Games ya Hangzhou nung September 23 nü tenzüksü aser October 8 nü tembangtsü.

G20 senden nung Xi madentsü... (Tapak 7nungi...)

Taoba küm November ita Indonesian asetkong Bali nung lenir aja ajuruteper ita ana sülen China nunger spy balloon ka US anüng nung lia raksatsü aser ken o jembishinü tenzüksü ita aika agi menua liasü.

Linük ana ya ken o aika nung opang mapur aser item rongnung Russia-i Ukraine amakba, Xinjiang aser Hong Kong nung human rights, Taiwan aser South China Sea par meuong ama kibur akumba aser rongsenketzung tsütsü tenokdangba agütsüba ajanga

Beijing-i high-tech osettem ajema angur.

Tesendaktep tajungba akumtsü meranga tawa US ketdangsür aikati China semdanga liasü. Item rongnung Secretary of State Antony Blinken, Treasury Secretary Janet Yellen, aser US Special Envoy for Climate John Kerry nungertem densema lir.

Kasa mapang Xi-i maneni 'developing world' nung Beijing ya lenir ama sayur aser Washington-i aniba 'world order' melen telok tentetsü

meranger.

BRICS linüktem indang lenirtem ajurutsü asoshi taoba ita South Africa-i aodang pai West aitsü aser 'developing nations' tem dang colonialism samadaktsütsü ajungshia liasü.

BRICS ya mezüngbo developing countries pongu Brazil, Russia, India, China aser South Africa agi tenteta liasü.

Saka ano January ita linük trok - Argentina, Egypt, Iran, Ethiopia, Saudi Arabia aser United Arab Emirates - adentsü aser ibai Beijing asoshi takok ka amai züngshir.

US Open: Djokovic aser Gauff quarter-i iogo

Rongjui/September 4, 2023

(Agencies): Tang asaya aliba US Open tebur jika asaya nung Deobarnü Novak Djokovic-i Croatia nunger qualifier Borna Gojo koka iba asayamung nung tang agi 13benbuba quarter-final tongtetogo.

Iba asaya ya US Open asemben tashi koker aliba asayar yagi 6-2, 7-5, 6-4 agi kokogo aser pa quarter nung America nunger rongnungi No. 1 asayar Taylor Fritz den asayatsü.

Deobarnü tebur kija asaya nungsa Fritz ya America nunger tebur asayartem rongnungi quarter-finals tongtetba asayar tasembuba kümogo.

Pai Swiss qualifier Dominic Stricker 7-6 (7/2), 6-4, 6-4 agi koka liasü.

Pa külem America nunger asayar Frances Tiafoe aser Ben Shelton na den quarter-i iogo. 2005 küm sülen tang mezüngbuba US nunger tebur asayar asem iba asayamung nung quarterfinals-i iogo.

Tiafoe-i Australia nunger asayar Rinky Hijikata 6-4, 6-1, 6-4 agi akok aser Shelton-i külem America nunger asayar Tommy Paul 6-4, 6-3, 4-6, 6-4 agi koka liasü. Quarter nung

Tiafoe aser Shelton na asayatsü.

Kasa asayamung tetsür kija asaya nung sixth seed Gauff-i set asem asayaba sülen taoba mapang world numbe 1 asayar Wozniacki 6-3, 3-6, 6-1 agi koka liasü.

Wozniacki shiba Gauff küm ka asüba mapang la indang career tenzüka liasü, la 2020 küm Australian Open sülen asaya nungi anena liasü. La lar kibong nem mapang peria agütsütsü atema asaya nungi anena aser tang maneni asaya tenzükgogo.

Maneni Tetsür kija asaya nung defending champion Iga Swiatek tsükgogo. La world number 20 Latvia tsür Jelena Ostapenko-i tsükdakja liasü.

Asaya nung set ka mekoki aliba nungi meyipa arura Ostapenko-i 3-6, 6-3, 6-1 agi Swiatek madak takok ngua liasü. Tena tsüngda asaya ghonda ka ser minute 48 asaya liasü.

Iba asaya makokba tetezü Swiatek, hopta 75 tashi tetsür kija asayartem rongnungi temaba jenjang nung aliba sülen rangking asayaba mapang la Aryna Sabalenka-i ajatetsü.

Bangladesh nunger asayar Litton asayatsü temsüa kümogo

Rongjui/September 4, 2023

(Agencies): Bangladesh nunger batter Litton Das asayatsü asoshi temsüa akümba sangdongba sülen tang asaya aliba Asia Cup atema team jenjang tajungba kümogo, ta chief selector-i ashi.

Litton ya shirangba ajanga Bangladesh pur mezüngbuba asaya ana nung shilem magitet aser pa Anamul Haque-i khen atema melenzüker liasü.

Mezüngbuba asaya nung Sri Lanka wicket pongu agi makokba sülen Bangladesh team-i Deobarnü tanabuba asaya nungbo Afghanistan team run 89 agi koka liasü.

"Litton anema kümogo aser pa team den adentsü atema taonung Pakistan-i aotsü," ta Minhajul Abedin-i AFP dang ashi.

Afghanistan kanga junga akokba sülen Bangladesh team run rate kanga junga küma Sri Lanka ajateter asaya semifina-i iogo. Par telok nungi ano koba team semifina-i aitsü aji Mongolbarnü Lahore nung Sri Lanka aser Afghanistan na asayaba sülen jangjatsü.

Litton Das temang anema küm team-i tanaben meyipa

aruba ya Bangladesh team asoshi anisüngzük ka asütsü, kechiyong team nung fast bowler, Ebadot Hossain-a yiruba ajanga tetsükdaktsü adoker lir.

Bangladesh den asayaba mapang batsmen Najmul Hossain Shanto aser Mehidy Hasan Miraz nati kanga junga asayaogo. Lahore nung tena senteper run 194 yanglua liasü.

Ajisüaka Miraz yiruba ajanga asaya toktsütsüsa aküm aser Shanto shiba molatsü atuba ajanga timtema liasü pa-a run out süatok. Asaya nung Miraz-i run 112 aser Shanto-i run 104 yanglua liasü.

Bangladesh pur semifinal nung Pakistan den asayatsü, shirnok Group A nungi qualify süatokogo. Team ana tsüngda Bodhbarnü Lahore nung asayatsü.

Asia Cup ya Pakistan aser Sri Lanka na senteper ayongzuka asayadar, kong team troki shilem agidaki. Iba asayamung ya India nung asayatsü aliba ODI World Cup atema renemshitsü asoshi tongtibang asayamung ka lir. Asia Cup final ya September 17 nü asayatsü.

BILEMDANGANG

"Ali rongsen agi masü saka yimyayimpong agi nisung ka jangjar."